

Nuwe Lied Bediening

En Hy het 'n nuwe lied in my mond gegee, 'n lofsang tot eer van onse Elohiem (Ps. 40:4)

E-pos: kontak@nuwelied.info
Webwerf: <http://www.nuwelied.info>

Yeshua is die Boom van die Lewe. Wanneer ons die Torah bestudeer moet ons onthou dat Yeshua Messias die Lewende Torah is – die Woord van YHVH wat vlees geword het. Hy is die weg na die waarheid wat lewe gee – die Lewende Manna wat uit die hemel gestuur is. Sonder Yeshua wat deur die Afgesonderde Gees in ons, en deur ons lewe, sal die geskrewe Torah net die dooie letter van die wet wees!!

Yeshua is die hart van die Vader!

Parashah 29: Acharei Mot (מֹות אַחֲרַי): Na die Dood

יהוה het met Moshe gepraat ná die dood van die twee seuns van Aharon, wat gesterf het toe hulle nadergekom het aan die Teenwoordigheid van יהוה. Lev. 16:1 – PWL¹

Torah: Lev. 16:1 tot 18:30

Haftorah: Eseg. 22:1 tot 19

Nuwe Verbond: Rom. 3:19 tot 28; Rom. 9:30 tot 10:13; 1 Kor. 5:1 tot 13; 6:9 tot 11; 2 Kor.2:1 tot 11; Gal. 3:10 tot 14; Hebr. 7:23 tot 10:25.

Hierdie notas is aanvullend tot die vorige notas vir Parashah 29 wat afgelaai kan word by: [Parashah29Notas14](#) en by [Parashah29Notas15](#).

Those who cannot remember the past are condemned to repeat it — George Santayana

Silence in the face of evil is itself evil – Dietrich Bonhoeffer

Torah Bespreking

Inligting, Kennis En Waarheid

Toegang tot inligting was nog nooit so maklik soos deesdae nie en ons word voortdurend aan 'n magdom inligting blootgestel. Inligting is wel kennis, maar dit is nie noodwendig die waarheid nie! Daarom is dit uiters belangrik om die verskil te verstaan tussen inligting,

¹ Alle teksverwysings is geneem uit PWL Vertaling, behalwe waar anders vermeld. Die PWL Vertaling (Pad van Waarheid tot die Lewe) kan gratis afgelaai word by www.padwlewe.ch, maar is ook nou in gedrukte formaat beskikbaar. Om 'n kopie van die Bybel te bekom kan Gerrie Coetzee per e-pos by padwlewe@yahoo.com of telefonies by 074 361 2134 gekontak word.

kennis en die waarheid, want jou en my lewe – beide geestelike en fisiese lewe – hang daarvan af!!

Eerstens moet ons verstaan dat inligting is niks anders as inligting! Dit kan waar of onwaar wees; dit kan waardevol of nutteloos wees; dit kan opbouend of afbrekend en selfs gevaarlik wees!

Ons kan dit ook anders stel, naamlik: Inligting is kennis en die twee saam maak dit 'n feit, maar hierdie feit maak dit nie noodwendig die waarheid (feitelik korrek) nie! So, wat is dan die definisie van waarheid? **Waarheid is dit wat nie verander nie!** Inligting, kennis en feite kan egter verander, maar nie die waarheid nie! Die volgende foto illustreer hierdie punt:



Hierdie foto word vir jare deur die elektroniese media, veral deur Christene, versprei as bewys van die bestaan van reuse soos dit in die Bybel opgeteken is (Gen. 6:4; Num. 13:4; 1 Sam. 17).

Hierdie inligting is deur talle gesien as kennis wat die waarheid is op grond van die sigbare feite op die foto. Maar die inligting is egter onwaar, want die foto is deur beskikbare rekenarsagteware verander om dit wat 'n normale mens se geraamte is, soos die van 'n reus te laat lyk. Met hierdie inligting is die kennis dus verkry oor wat feitelik korrek is en wat ons by die waarheid bring wat nie verander nie! Wat aanvanklik as feitelik korrek beskou was, het dus verander om aan ons die onveranderlike waarheid te openbaar!

Wat is die les wat ons uit hierdie voorbeeld leer? Ons moet nie inligting net blindelings glo en as kennis beskou wat die waarheid is nie! Wat ons sien en hoor is nie noodwendig die waarheid nie!

Maar ons almal het die neiging om inligting wat ooreenstem met ons huidige verwysingsraamwerk en met ons huidige kennis as feitelik korrek, en dus as die waarheid, te glo en dit dan te verkondig!

Dit is juis hierdie neiging wat vir ons almal gevaar inhou, veral ten opsigte van geestelike inligting. Ons word toegewooi onder geestelike inligting en ons moet hierdie inligting evalueer met die doel om te kan onderskei tussen die waarheid en die leuen. Geestelike inligting vereis ons aandag, want ons ewige lewe hang daarvan af.

I have long believed that one's spiritual life is a matter of "attention," and there are many forces competing for our attention in this hour, both individually and collectively. Reasoning men and women must be sceptical, even suspicious, of everything put before them (W. L. Graham).

Wanneer ons op soek is na die geestelike waarheid is ons vertrekpunt die versekering dat YHVH se Woord die waarheid is – die onveranderlike! YHVH is God en Sy woord is die waarheid (2 Sam. 7:28). Daarom het Yeshua aan sy dissipels gesê:

Hulle is nie vanuit die wêreld nie, net soos Ek nie vanuit die wêreld is nie. Vader, sonder hulle af in U waarheid, want U boodskap is die waarheid. Joh. 17:16 en 17

Die Vader se wil is om Sy kinders af te sonder (te heilig) in Sy boodskap (Woord) wat die onveranderlike waarheid is! En ons weet dat Yeshua is die lewende Woord. Daarom wil die Vader ons afsonder in Yeshua die Messias!

YHVH het Sy Gees, die Gees van die waarheid aan ons gegee om ons te leer en te lei.

*Ek sal die Vader vra en Hy sal vir julle 'n ander Bevryder en Lewegewer gee om by julle te bly tot in ewigheid. **Hy is die Gees van die Waarheid**, wat die wêreld nie kan ontvang nie omdat dit Hom nie gesien het of Hom geken het nie, maar julle ken Hom omdat Hy by julle bly en in julle is. Joh. 14:16 en 17.*

Yeshua het ook aan sy studentevolgelinge (dissipels) gesê:

Ek het nog baie dinge om vir julle te sê, maar julle kan dit nie nou ontvang nie, maar wanneer Hy, die Gees van die Waarheid, gekom het, sal Hy julle in die hele waarheid lei, want Hy sal nie uit Homself praat nie, maar alles wat Hy hoor, sal Hy sê en die toekoms aan julle openbaar. Hy sal My vereer en loof omdat Hy, uit wat aan My behoort sal vat en aan julle sal wys. Alles wat My Vader het, is Myne; daarom het Ek gesê dat Hy dit sal vat uit wat aan My behoort en aan julle wys. Joh. 16:12 tot 15.

Let op dat Yeshua hier aan sy volgelinge sê dat Hy nog baie dinge (waarhede) het om vir hulle te sê, maar dat hulle nie nou gereed is om dit te ontvang nie. Hierdie 'nog baie dinge' sal deur die Gees van die Waarheid aan hulle openbaar gemaak word! Die Afgesonderde Gees sal hulle in die hele waarheid lei!

In die lig hiervan kan ons verstaan waarom Yeshua byvoorbeeld nie Sy dissipels geleer het aangaande die verandering ten opsigte van die priesterorde nie, naamlik dat die Levitiese priesterorde uitgedien is en met die Melgisédék priesterorde vervang word. Hierdie waarheid sou deur die Afgesonderde Gees aan die skrywer van die brief aan die Hebreërs openbaar word!

Die Gees van die Waarheid lei en leer ons almal en tog kom ons as gelowiges in Yeshua dikwels by verskillende 'waarhede' uit. Ons elkeen glo graag dat ons in die lig van die waarheid wandel, en tog verskil ons dikwels sodanig dat ons onself in verskillende denominasies of groepe groepeer waar ons dit wat ons glo die waarheid is, met oorgawe verdedig. Hoewel ons almal saamstem dat die Skrifte die onderrig en instruksies (die leerstellings) van YHVH is, verskil ons dikwels oor hoe dit verklaar word.

Geestelike groei vind plaas wanneer die inligting en kennis waaroor ons aangaande YHVH se Woord beskik, voortdurend vermeerder. Daarom moet ons besef dat die inligting en kennis waaroor ons op enige tydstip beskik nie die volle waarheid is nie, want ons almal ken slegs ten dele (1 Kor. 13:9 tot 12). Paulus het hier na blink gepoleerde brons (koper) verwys wat as 'n spieël van daardie tyd gedien het en wat nie so 'n helder beeld weerkaats het as die hedendaagse glasspieëls nie.

First Fruit of Zion skryf die volgende in die verband:

Remembering that we do not see God clearly should help keep us humble. It should make us reluctant to criticize other people's theologies and their experiences with God. They may have perceived an aspect of the Almighty that we have not, or we may have found revelation that has been withheld from them. Neither of us is to be blamed for not seeing the whole picture. In this world, the whole picture is not available. Yeshua told the

theologians of His day, "You have neither heard His voice at any time nor seen His form" (John 5:37). That is why a true appreciation for the greatness of God excludes religious arrogance. The Apostle Paul exclaimed, "Now I know [only] in part, but then I will know fully" (1 Corinthians 13:12). Nobody on this side of the veil has apprehended absolute truth (Parashah Acharei Mot, 2016).

Ons almal het leemtes in ons kennis van YHVH en van Sy Woord. Maar wanneer ons met vurige ywer en met 'n leerbare gees YHVH se Woord bestudeer, sal die onveranderde waarheid toenemend aan ons openbaar word.

Daarom het Petrus die volgende geskryf:

maar julle moet groei in die onverdiende guns en kennis van ons Meester en Verlosser, Yeshua, Die Gesalfde Een en van God-die-Vader, aan Wie die eer, lof en aanbidding nou en altyd toekom tot in ewigheid. Dit is waar! 2 Pet. 3:18.

Ons moet daagliks in die waarheid van YHVH se Woord groei. Die vraag is dus hoe reageer ons as ons met geestelike inligting gekonfronteer word? Ons moet baie versigtig wees vir 'n gesindheid van: *I have made up my mind, do not confuse me with the facts.* 'n Gesindheid van ek het klaar besluit wat ek glo, moenie my met feite kom deurmekaar maak nie, is nie 'n leerbare gees nie!! Onthou: Elkeen is self verantwoordelik om die waarheid te ontdek en te bevestig.

In ons soeke na die Waarheid moet ons die volgende gesindheid hê: Eerstens moet ons heeltemal eerlik met onself wees, en nie vashou aan vooropgestelde sieninge (leerstellings) nie. Tweedens moet ons vreesloos wees vir dit wat ander mag dink, sê of doen wanneer ons iets glo wat teenstrydig is met dit wat hulle glo. Alleenlik dan sal die Waarheid ons vry kan maak, en sal ons geestelik groei.

en trek die nuwe aan wat voortdurend in kennis, in die beeld van sy Skepper, nuut gemaak word, waar daar nie Jood en Arameër, besnedene en onbesnedene, Griek en barbaar, of slaaf en vryman is nie, maar Die Gesalfde Een alles en in almal is. Kol. 3:10 en 11.

Geliefdes, ons moet derhalwe altyd onthou dat inligting is kennis, maar dit is nie noodwendig die waarheid nie! Waarheid is dit wat nie kan verander nie! Die Woord van YHVH, Sy onderrig en instruksies, is die Waarheid. Ons almal moet voortdurend strew na hierdie waarheid!

Ontvang YHVH se Woord met welwillendheid, maar ondersoek self die Skrifte of hierdie dinge die waarheid is (Hand. 17:11).

Nadab en Abihu

Die vertrekpunt van ons Torahskriflesing is die herinnering aan die sterwe van Nadab en Abihu nadat hulle in die teenwoordigheid van YHVH met vreemde vuur gekom het

יהוה het met Moshe gepraat ná die dood van die twee seuns van Aharon, wat gesterf het toe hulle nadergekom het aan die Teenwoordigheid van יהוה. (Lev. 16:1).

Hierdie is bevestiging en 'n waarskuwing dat ons nie net die Waarheid moet ken nie, maar dat ons dit ook moet doen! Ons moet YHVH se geregtigheid doen (1 Joh. 2:29; 1 Joh. 3:7)

Welgeluksalig is hulle wat die reg bewaar, die wat altyd geregtigheid doen. Ps. 106:3 (1953, AOV).

Gehoorsaamheid aan YHVH se onderrig en instruksies is om die geregtigheid te doen!

Yeshua sê vir die Jode wat in Hom vertrou het: “As julle voortdurend in My boodskap bly, dan is julle ware studentevolgelinge van My en julle sal die waarheid ken en daardie waarheid sal julle vrymaak. Joh. 8:31 en 32.

Ons moet die waarheid gaan soek en dit dan doen! Sonder die ‘doen’, naamlik die toepassing van die waarheid, is waarheid nutteloos!

Nadab en Abihu het nie hulle “taakoms krywing” volgens YHVH se voorskrifte (Torah) uitgevoer nie en het gesterf (Lev. 10:2)!! Hulle het die grense van dit wat *kadosh* (heilig, afgesonder) en *tahor* (rein) is oorskrei en opgetree in die realm (area) van *chol* (onheilig) en *tamei* (onrein). Met ywer het hulle in ‘n toestand van onreinheid volgens hulle eie geregtigheid opgetree en geglo dit sal vir YHVH aanvaarbaar wees!

Nadab en Abihu het die waarheid geken, maar hulle het nie volgens die waarheid gehandel nie. Hulle het in die teenwoordigheid van YHVH opgetree volgens hulle eie kennis wat hulle as die waarheid beskou het! Dit het hulle dood gekos!

Geestelike Waarheid en die Geskiedenis.

In ons soeke na geestelike waarheid is ons vertrekpunt die versekering dat YHVH se Woord die waarheid is – die onveranderlike! Ons weet dat YHVH geen mens is dat Hy sou lieg nie!

Die Magtige God is nie 'n man dat Hy sou lieg nie, of 'n mensekind dat Hy jammer sal wees nie. Het Hy gesê en sal dit nie doen nie, of het Hy gepraat en sal dit nie waar maak nie?
Num. 23:19.

Maar ons moet ook besef dat die geskiedenis dikwels ‘n hulpmiddel kan wees in ons soeke na geestelike waarheid. Beide die Skrifte van die ou en die nuwe verbond hou verband met geskiedkundige gebeure. Hoewel die Afgesonderde Skrifte ook as ‘n geskiedkundige handleiding kan dien, gee dit nie altyd die volledige geskiedkundige agtergrond nie. Daarom is dit dikwels nodig dat ons ook die geskiedenis moet navors, want dit sal help om by die geestelike waarheid uit te kom en om geestelike waarhede beter te verstaan.

Betroubare geskiedkundige bronne kan help om ons van misleiding te bewaar en kan ‘n hulpmiddel wees om profesie te verstaan en te verklaar.

Bepeins of Bespreek

1. Ons elkeen moet voortdurend onself vra: Glo ek omdat dit die waarheid is of is dit vir my die waarheid omrede ek dit glo? Die gevaar is wanneer dit die waarheid word omrede jy dit glo! Onthou: Satan is ‘n meester om die leuen na waarheid te laat lyk!
2. *It is better to be hurt by the truth than to be devastated by lies.* Die leuen kan jou dood – fisiese en geestelike – veroorsaak. Maar hoe kan die waarheid jou seermaak? Wat van die verwerping en vervolging deur geliefdes en vriende wat dikwels die gevolg is omrede jy die waarheid glo en doen? Maar onthou: *A successful man is one who can lay a firm foundation with the bricks that others throw at him!*

3. Geskiedenis het bewys gelever dat feeste soos Kersfees en *Easter* heidense oorsprong het en tog het die Christendom dit vir ons as die waarheid geleer en verkondig dit steeds as waarheid. Wat van Rabbynse Judaïsme en Sionisme? Is daar ook dinge wat hulle as die waarheid verkondig, maar wat volgens die geskiedenis 'n leuen is? Byvoorbeeld: Is die kalender van Rabbynse Judaïsme die ware kalender van YHVH? Wat leer die geskiedenis ons? Hoekom is daar 'n groot groep Torahgetroue Rabbies wat gekant is teen die tot standkoming van die Sionistiese staat van Israel? Wat leer die geskiedenis ons in die verband. Het jy dit al self ondersoek? Onthou die volgende:

History, despite its wrenching pain, cannot be unlived, but if faced with courage, need not be lived again – Maya Angelou

History is an account, mostly false, of events, mostly unimportant, which are brought about by rulers, mostly knaves, and soldiers, mostly fools – Ambrose Bierce

Yom Kippur – Die Groot Versoendag

Die hoogtepunt van parashah *Acherei Mot* is die Groot Versoendag, ook bekend as die dag van Toedekking en in Hebreeus as *Yom Kippur*. Hierdie is deel van die Vasgestelde Tye (Feestyte) van YHVH soos in Lev. 23:26 tot 31 beskryf word. Dit is deel van die derde en die laaste feesseisoen bestaande uit die Fees van die Basuin (*Yom Teruah*), Die Versoendag (*Yom Kippur*) en die Fees van Tabernakels (*Sukkot*).

'n Meer volledige bespreking van die doel en betekenis van die Groot Versoendag word in vorige notas bespreek. Hierdie notas kan afgelaai word by [Parashah29Notas14](#).

Maar wanneer ons hierdie gedeelte bestudeer is dit om die geestelike waarhede te ontdek soos dit in Messias Yeshua vervul is. Hierdie was deel van YHVH se geregtigheid wat Israel moes doen totdat Yeshua gekom het. Die tabernakel, priesterorde en offerandes was 'n bloudrukplan vir 'n toekomstige heerlijkheid wat deur Yeshua 'n werklikheid geword het!

Daarom is dit belangrik om te verstaan dat beide Pesag en die Dag van Toedekking 'n sinnebeeld is van die versoening met YHVH deur die Lam van God, naamlik Yeshua Messias wat vir ons sondes gesterf het. Hoewel daar ooreenkomste tussen die twee Vasgestelde Tye is, is daar egter ook sekere verskille.

Beide Pesag en die Dag van Toedekking dien as herinnering aan die eenmalige offer wat vir vergifnis van sonde gebring is.

Die priesters het elke keer in die buitenste Tabernakel ingegaan en hulle bediening uitgevoer, maar in die binneste van die Tabernakel het die hoofpriester alleen, een maal per jaar, met bloed, wat hy offer vir sy lewe en vir die oortredinge van die mense, ingegaan.

Hierin het die Gees van Afsondering geleer dat die pad van Afsondering nog nie openbaar is, solank as wat die eerste Tabernakel nog staan nie.

Dit was 'n bloudrukplan vir daardie tyd, waarin daar geskenke en offers gebring is, wat hom, wat hulle offer, se gewete nie volkome kon maak

deur kos, drank en verskillende reinigingswassings, wat vleeslike instellings is, wat vasgestel is tot op die tyd van hervorming, nie, maar Die Gesalfde Een, wat gekom het, het die Hoofpriester geword van die goeie dinge wat Hy gedoen het en Hy het die groot en volmaakte Tabernakel binnegegaan, wat nie met hande gemaak is nie en nie van hierdie geskepte dinge is nie.

Hy het ook nie ingegaan met die bloed van jaarouë bokke en kalwers nie, maar met Sy eie bloed het Hy een maal in die plek van Afsondering ingegaan en ewige loskoping verkry, want as die besprinkeling van die wat onrein is, met bloed van bulle en bokke en die as van 'n vers, hulle kan afsonder tot reiniging van die vlees, hoeveel te meer sal die bloed van Die Gesalfde Een, wat Homself, sonder vlek, deur die ewige Gees aan God geoffer het, ons gewete reinig van dooie werke, om die lewende God te dien. Heb 9:6 tot 14.

Yeshua het as Ewige Hoofpriester volgens die beeld van Melgisédék die volmaakte tabernakel ingegaan en met sy eie bloed loskoping van sondeskuld verkry vir elkeen wat vertrou in Yeshua as die geslagde Lam van YHVH-God. Yeshua het een offer vir ons sondes gebring en toe gaan sit aan die regterhand van God.

Elke hoofpriester staan elke dag om te bedien en dieselfde offers te bring wat van die ou tyd af nooit die sondes kon verwyder nie, maar Hy het een offer ter wille van sonde gebring en gaan sit aan die regterkant van God vir altyd. Heb. 10:11 en 12

Ons Melgisédék Hoofpriester het aan die regterkant van YHVH – die plek van eerbewys en outoriteit – gaan sit. Hiermee word bevestig dat ons Hoofpriester se taak van versoening met YHVH deur fisiese offers vir ewig afgehandel is! Die jaarlikse Toedekking van die sondes van Israel is vir ewig afgehandel.

want deur een offer het Hy vir altyd die wat daardeur afgesonder is, tot die doel gebring.

Die Gees van Afsondering getuig ook vir ons en sê:

“Dit is die verbond wat Ek met hulle sal sluit ná dié dae,” sê יהוה; “Ek sal My wet gee in hulle begrip en in hulle verstand, wil en emosie sal Ek dit inskryf en hulle sondes en hulle oortredinge van die wet sal Ek nie onthou nie,”

maar waar daar vergifnis van sonde is, is daar nie 'n offer vir die sonde nodig nie. Heb. 10:14 tot 18.

Yeshua is ons Pesag en ons Toedekking! Die fisiese is afgehandel volgens YHVH se Raadsplan! Daarom is die doel en betekenis van Pesag en die Groot Versoendag slegs geestelik van toepassing. Ons bring geen fisiese offer nie, maar wel geestelike offers – lofoffers en dankoffers, asook ons liggame as 'n lewendige offer om as tempel vir die Afgesonder Gees te dien en om YHVH se wil te doen!

Bepeins of Bespreek

1. Rabbynse Judaïsme verwerp Yeshua as Toedekking vir elkeen wat vertrou het in Yeshua as die gekruisigde en opgestane Messias. Daarom het Torahgetroue Jode 'n verlange om die tempel te herbou sodat hulle weer die offerandes volgens die Torah van Moses, en onder die gesag van 'n Levitiese priesterorde, kan bring. So sal hulle dan ook die jaarlikse Yom Kippur gedenk volgens die voorskrif soos in hierdie week se Torahskriflesing uiteengesit word. Sal dit nie 'n gruwel in YHVH se oë wees nie? Die bewys dat hulle na al die eeue steeds Yeshua verwerp?!

En Julle Moet Jul Verootmoedig.

En dit moet vir julle 'n ewige insetting wees: in die sewende maand, op die tiende van die maand, moet julle jul verootmoedig en géén werk doen nie die kind van die land sowel as die vreemdeling wat onder julle vertoef. Want op hierdie dag moet hy vir julle versoening doen

om julle te reinig; van al julle sondes moet julle voor die aangesig van YHVH rein word. 'n Dag van volkome rus moet dit vir julle wees, en julle moet jul verootmoedig. Dit is 'n ewige insetting. Lev. 16:29 tot 31 – 1953 AOV.

Hierdie opdrag word ook in Lev. 23:32 herhaal:

'n Dag van volkome rus moet dit vir julle wees, en julle moet jul verootmoedig. Op die negende van die maand in die aand, van aand tot aand, moet julle jul sabbat hou (1953 AOV).

Die King James vertaal dit soos volg: *It shall be unto you a sabbath of rest, and ye shall afflict your souls.* Dit beteken om jou siel te teister en te beproef.

Die opdrag is om op die Dag van Toedekking jouself te verootmoedig (Hebreeus: *anah*) en nie om te vas (Hebreeus: *tsoom*; byvoorbeeld in 2 Sam 12:23) nie, naamlik om jouself van voedsel te weerhou. Die Dag van Toedekking is 'n dag wat elkeen sy siel, naamlik sy wil, denke en emosie moet teister en beproef of dit in alle opsigte aan YHVH se vereistes voldoen.

Verootmoediging is om jouself te verneder!

Wees nederig voor יהוה en Hy sal julle oplig. Jak. 4:10.

Word nederig gemaak onder die kragtige hand van God sodat dit julle kan oplig op die regte tyd. 1 Pet. 5:10.

Ons lees in Deut. 8:16 dat Israel manna in die wildernis geëet het om hulle nederig te maak en hulle te beproef sodat YHVH uiteindelik aan hulle goed kan doen.

wat jou in die wildernis met 'man hu', wat jou vaders nie geken het nie, gevoed het, om jou nederig te maak en jou te toets, om jou ten einde goed te doen.

Yeshua is die manna (brood) wat uit die hemel neergedaal het. Om van hierdie manna te eet is verootmoediging – om jouself te verneder, want dit is om in berou voor die Gesalfde Een te buig en te vra vir vergifnis van sonde.

Julle vaders het die 'man hu' in die wildernis geëet en het doodgegaan. Hierdie is die Brood wat vanuit die hemel afgekom het sodat iemand daarvan kan eet en nie doodgaan nie. Joh. 6:49 en 50.

Hierdie is die Brood wat vanuit die hemel afgekom het; nie soos julle vaders wat die 'man hu' geëet en doodgegaan het nie; wie hierdie Brood eet, sal tot in ewigheid lewe.” Joh. 6:58.

Yeshua is die Manna-Woord van YHVH waarmee ons daaglik gevoed moet word tot vernuwning van ons denke sodat ons kan onderskei wat die goeie, aanvaarbare en volmaakte wil van God is. Ons verootmoedig onself wanneer ons ons liggame beskikbaar stel as lewende, afgesonderde en aanvaarbare offers vir God.

My broers, daarom smee ek julle, deur die guns van God dat julle jul liggame beskikbaar stel as lewende, afgesonderde en aanvaarbare offers vir God; dit is julle logiese dienswerk en moenie hierdie wêreld navolg nie, maar word verander deur die vernuwning van julle denke en julle sal kan onderskei wat die goeie, aanvaarbare en volmaakte wil van God is. Rom. 12:1 en 2.

Yeshua is ons Hoofpriester volgens die orde van Melgisédek wat Homslef verneder het en wat gehoorsaam was tot die dood toe.

Hierdie gesindheid moet in julle wees wat ook in Die Gesalfde Een, Yeshua, is, Hy wat, terwyl Hy die afbeelding van God was, dit geen roof geag het om soos God te wees nie, maar Homself gestroop en die gestalte van 'n slaaf aangeneem het in die vorm van 'n mens en gevind is in die gedaante van 'n man: Hy het Homself verneder en was gehoorsaam tot die dood toe, die dood deur gekruisig te word.

God het Hom daarom ook tot die hoogste plek opgelig¹ en aan Hom die Karakter en Outortiteit (naam) gegee wat bo elke karakter en outoriteit (Naam) is sodat elke knie sal buig tot eer van die Karakter en Outoriteit (Naam) wat aan Yeshua gegee is,² dié wat in die hemel en dié wat op die aarde en dié wat onder die aarde is en elke tong sal erken dat Yeshua, Die Gesalfde Een, יהוה is, tot eer, lof en aanbidding van God-die-Vader. Fil. 2:5 tot 11.

Hierdie gesindheid van die Gesalfde Een moet ons ook openbaar en dit is wat die Dag van Toedekking 'n sinnebeeld onder die nuwe verbond van is. 'n Gesindheid wat ons elke dag moet openbaar. Ons verootmoedig ons daaglik deur ons nie te weerhou van voedsel nie, naamlik deur te vas nie, maar deur ons te weerhou van die begeertes van die vlees wat hoogmoed is. Ons verootmoedig ons voor YHWH deur Sy wil te doen.

Die Dag van Toedekking is 'n herinnering aan die geestelike toepassing van dit wat in die Torah van Moses 'n skaduwee was van 'n toekomstige waarheid wat in Yeshua vervul is. Laat ons dus met die vernuwing van ons denke as 'n Melgisédek priesterorde die Dag van Toedekking gedenk.

Bepeins of Bespreek

1. Lees Jes. 58:1 tot 11 en let op, veral in verse 5 tot 7, die vas (*tsoom*) wat YHWH van ons elkeen vereis. Is dit ook gelykstaande aan verootmoediging?
2. Rabbynse Judaïsme leer (en ek het dit ook verkondig) dat die Dag van Versoening die Groot Vasdag is waar jy jou liggaam van enige voedsel vir 24 uur ontnem. Hierdie is egter tradisie, want ons woordstudie het ander bewys gelewer. In die lig van dit wat in Yeshua vervul is, is die Groot Versoendag 'n ware feesdag van dankbaarheid vir versoening met YHWH ons Vader deur die genade in Yeshua Messias en waar ons met die gesindheid van Yeshua welwillendheid aan ons medemens met toon (Jes. 58:5 tot 7)! Vergelyk ook Jakobus se verduideliking van die nuttelosheid van vertrouwe sonder werke (Jak. 2:14 tot 26).

As 'n broer of 'n suster kaal is en nie kos vir die dag het nie en enige van julle sou vir hulle sê: "Gaan heen in vrede, gesondheid, voorspoed en vergenoegdheid, wees warm, wees versadig, maar julle gee hulle nie dit wat vir die liggaam nodig is nie; watter voordeel het dit? Net so is ook die 'geloof', as dit geen daede het nie, in sigself dood, want iemand sê vir jou: jy en ek het 'geloof'; ek het werke. Wys my jou 'geloof' sonder daede en ek sal jou my vertrouwe deur my daede wys. Jak. 2:15 tot 18.

-0-0-0-0-0-0-

Ontvang YHVH se Woord met welwillendheid, maar ondersoek self die Skrifte of hierdie dinge die waarheid is (Hand. 17:11).

Shabbat Shalom.

Johan.

Epos: kontak@nuweliel.info

Webwerf: <http://www.nuweliel.info>

Kopieë mag gemaak en gratis versprei word, maar mag nie verkoop word nie. Geen veranderinge mag aan die oorspronklike teks aangebring word en dit dan onder die naam van Nuwe Lied Bediening versprei nie.